

Peqqissaanermi ikiortit ilinniartitaanerat pillugu Namminersornerullutik Oqartussat nalunaarutaat

Inuussutissarsiutinut ilinniartitaanerit inuussutissarsiutinullu pikkorissartitsisarnerit pillugit Inatsisartut peqqussutaanni nr. 2-mi, 31. maj 1999-imeersumi § 8, imm. 4, § 22, imm. 2, § 27, imm. 3, § 28, imm. 4, § 34, imm. 2 aamma § 52, imm. 2 kiisalu § 7, imm. 3, § 12, imm. 1 aamma 2, malillugit Peqqinnissaqarfimmi Ilinniartitaanernut Ataatsimiititaliap inassuteqareerneratigut aalajangersarneqarput:

Kapitali 1

Ilinniartitaanerup siunertaa ilinniartitaanermullu ataatsimiititaliaq

§ 1. Peqqissaanermi ikiortitut ilinniartitaanerup siunertaraa ilinniartup makkuninnga piginnaasaqalersinnissaa:

- 1) peqqinnerulersitsiniarnermik napparsimanaveersaartitsinermillu suliaqarsinnaanermik,
- 2) inunnut ataasiakkaanut, napparsimasunut ataatsimoortunut sullissanullu allanut tunngatillugu isumassuilluni iliuuseqartitsiniarlunilu suliaassanik, matuma ataani timikkut, eqqarsarsinnaassutsikkut aamma pilersitsisinnaassutsikkut pisariaqartitsinernik, aaqquissuussisinnaanermik suliarinnissinnaanermillu nammineerluni nalilersuisinnaalernissamik,
- 3) napparsimmaveqarfiup avataani iluanilu peqqissaalluni sulinermit meeraaqqerinermit peqqissaanermillu tunngaviusumik suliaassanik pisariaqartitsinermik suliarinnissinnaanermillu nammineerluni nalilersuisinnaalernissamik, aammalu
- 4) suliaassanik aalajangersimasunik suliaqarsinnaalernissaaq anguniarlugu atuagarsorluni sulillunilu sungiusarnikkut ilinniaqqinnerit aqutugalugit piginnaaneqalersinneqarnissaa ilaatigut makku iluanni suliaqarsinnaalernissamik: tarrarsuinermit, kinguaassiuutitigut nappaatilerinermit, tusaasinnaassusilerinermit, aaviisarnikkut il.il. misissuinermit, ernisussiornermit, nunaqarfinni sullissinermit kiisalu suliaassani pisariaqartitsineqartuni allani.

§ 2. Peqqinnissaqarfimmi ilinniartitaanernut ataatsimiititaliaq peqqissaanermi ikiortitut ilin-niartitaanermi ataatsimiititaliatut atuutissaaq.

Kapitali 2

Ilinnialernissamut piumasaqaatit

§ 3. Peqqissaanermi ikiortitut ilinniagaqalernissamut akuerineqarsinnaanissaminut qinnuteqartoq minnerpaamik makkuninnga angusaqarsimassaaq

1) meeqqat atuarfianni inaarutaasumik misilitsinnermi kalaallisut aamma qallunaatut minnerpaamik 7-ersimassaaq aamma kisitsinnermut kiisalu matematikkimut minnerpaamik 6-ersimassaaq, aammalu
2) isumaginninnermi peqqinnissamilu ikiortitut ilinniartitaanerup peqqinnissamut tunngasortaani ilinniarsimassalluni imaluunniit tassunga assingusumik peqqinnissamut ilinniagassanik piginnaanngorsarsimassalluni.

Imm. 2. Peqqinnissakkut ilisimasassanik assingusunik piginnaaneqarnersut naliliiviginiarlugit Peqqissaanermik Ilinniarfiup qinnuteqartut ataasiakkaarlugit piginnaaneqarnerannik naliliivigisassavai.

Kapitali 3

Ilinniartitaanerup sivilissusia ilusaalu

§ 4. Ilinniartitaaneq feeriaqarnerit ilanngullugit ukiut aappaa affarmik sivilissuseqarpoq.

Imm. 2. Ilinniartitaaneq aallaqqaaserneqassaaq sapaatip-akunnerini 34-ni atuagarsornermik, piffissaq atuagarsorfusooq 1-imik taaneqartumik, tamatuma kingornagut sapaatip-akunnerini 35-ni piffissanut pingasunut immikkoortitikkamik sulilluni sungiusarnermik nangingneqassaaq inaarneqassallunilu sapaatip-akunnerini sisamani atuagarsorluni ilinniarnermik, piffissaq atuagarsorfusooq 2-mik taaneqartumik, taannalu soraarummeernertaqassaaq.

Imm. 3. Ilinniartitaanerup atuagarsornertaata sulillunilu sungiusarnertaata qanimut ataqtigiittumik aaqqissuunnissaata qularnaarnissaa Peqqissaanermik Ilinniarfiup akisussaaffigaa.

§ 5. Peqqissaanermik Ilinniarfiup atuagarsorluni ilinniarnerup sulillunilu sungiusarnerup erseqqinnerusumik aaqqissuunneqarnissaat ilinniartitaanerup aaqqissuussaananerani aalajangersaavigissavaa, tak. § 32, ilinniartitaanermut ataatsimiititaliap inassuteqaateqarneratigut ilinniartitaanermut pisortaqarfimmit akuerineqartussanngorlugu.

§ 6. Ilinniartitaanermut ataatsimiititaliap Peqqissaanermik Ilinniarfiup inassuteqarneratigut akuersissutigisinnavaa ilinniartup naleqquttunik ilinniagaqareersimasup suliaqareersimasulluunniit ilinniarnerup aggornerisa ilaannik alluiinnarsinnaanera.

§ 7. Atuarneqarnissamut sungiusarlunilu sulinissamut pinngitsoorani takkuttarnissaaq piumasaqaataavoq.

Imm. 2. Pinngitsoorani takkuttarnissaaq pillugu aalajangersakkat erseqqinnerusut ilinniartitaanerup aaqqissuussaananerani Peqqissaanermik Ilinniarfiup aalajangersaavigissavai.

Kapitali 4

Ilinniartitaanerup imarisaa

Atuarfimmi ilinniarneq

§ 8. Atuagarsorluni ilinniarneq katillugu nalunaaquttap-akunnerinik 1140-nik atuartitsiviussaaq ilinniagassanullu arfinilinnut imatut agguataarsimassalluni:

1) Ilinniagassat peqqissaanermut tunngasut, tak. § 9, ilitsersuilluni atuartitsinnermik nalunaaquttap-akunnerinik 355-inik atuartitsinertallit.

2) Ilinniagassat nappaatilerinnermut tunngasut, tak. § 10, ilitseruilluni atuartitsinermik nalunaaquttap-akunnerinik 285-inik atuartitsinertallit.

3) Ilinniagassat perorsaanermut tarnillu pissusiinut tunngasut, tak. § 11, ilitseruilluni atuartitsinermik nalunaaquttap-akunnerinik 170-inik atuartitsinertallit.

4) Ilinniagassat isumaginninnermut inuiaqatigiilerinnermullu tunngasut, tak. § 12, ilitseruilluni atuartitsinermik nalunaaquttap-akunnerinik 110-nik atuartitsinertallit.

5) Ilinniagassat suliffimmik aaqqissuussinnermut tunngasut, tak. § 13, ilitseruilluni atuartitsinermik nalunaaquttap-akunnerinik 110-nik atuartitsinertallit.

6) Ilinniagassat kulturimut attuumassutillit aamma susassaqaartitsinernut tunngasut, tak. § 14, ilitseruilluni atuartitsinermik nalunaaquttap-akunnerinik 110-nik atuartitsinertallit.

§ 9. Ilinniagassanik peqqissaanermut tunngasunik ilinniartitsinermi siunertaavoq ilinniartup isumassuinnermi suliaassat, meeraaqqerinnermi peqqissaanermilu tunngaviusumik suliaassat, peqqinnerulersitsiniarnermi napparsimanaveersaartitsinermilu suliaassat ilisimasaqarfigilerlugillu paasinniffigissagai, kiisalu paasinniffigissagai inuit ataasiakkaat innarluutigisinnaasaat isiginiarlugit namminiussutsiminnik, akulerusimassutsiminnik imminnullu oqartussaaffiginerminnik attassiinnarlutillu nukittuujaannartinnissaat.

§ 10. Ilinniagassanik nappaatinut tunngasunik ilinniartitsinermi siunertaavoq ilinniartup timip sananeqaataasa sulinerannik ilisimasaqalernissaa, kiisalu timikkut tarnikkullu nappaatinik atugaanerpaasartunik, taakkua pissutigisartagaannik ersiutaannillu taamatullu misissorneqartarnerannik katsorsarneqartarnerannillu paasisimasaqalernissaa.

§ 11. Ilinniagassanik perorsaanermut tarnimullu tunngasunik ilinniartitsinerup siunertaraa ilinniartup perorsaanikkut tarnikkullu taaguutini nalinginnaasunik ilisimasaqalernissaa, kiisalu aamma paasisaqarfigissagai inuup pissusilersorneranut ineriartorneranullu tunngatillugit taakkua inunnut ataasiakkaanut eqimattanullu qanoq atorneqartarnissaat.

§ 12. Ilinniagassanik isumaginninnermut inuiaqatigiilerinnermullu tunngasunik ilinniartitsinerup siunertaraa ilinniartup inuiaqatigiit aaqqissuussaannerat siunnerfeqarnerallu ilisimasaqarfigilissagai kiisalu inuiaqatigiinnguakkuutaat assigiinngitsut inooriaasaasa, inuuniarnikkut atugaasa aammalu piorsarsimassusiisa inuup inuuniarnermini atugassarisaanut sunniuteqartarnerat paasisaqarfigissagaa.

§ 13. Ilinniagassanik suliffimmik aaqqissuussinnermut tunngasunik ilinniartitsinerup siunertaraa ilinniartup peqqinnissaqarfiup iluani sulianik pilersarusiornermik, siulersuinnermik suleqatigiinnermillu periaatsinik ilisimannilerlunilu paasinninnissaa.

§ 14. Ilinniagassanik kulturimut susassaqaartitsinermullu tunngasunik ilinniartitsinerup siunertaraa ilinniartup ilisimasaqarfigilerlugillu paasisaqarfigissagai timitalimmik, isumassarsiornikkut, kulturikkut eqqarsartaatsimullu kaammattuutaasunik suliniuteqarnerit nakussassaavigineqarlutillu aallartisinneqartarnissaat, taamaaliornermi inuup nukissatigut kulturikkullu tunuliaqutai ataqqillugit.

Sulilluni ilinniarneq

§ 15. Sulilluni ilinniarnermi sungiusagassat pingaaruteqarnerit tassaapput isumassuineq, pisinnaanngorsaaneq, meeraaqqerineri peqqissaanermilu tunngaviusumik suliaasat, kiisalu peqqinnerulersitsiniarnermik pinaveersaartitsinermillu suliaqarneq.

Imm. 2. Sulilluni ilinniarnermi sungiusarneqassapput inuup timikkut nappaataanik ilinniarneq, matuma ataani pilattaaneq nalinginnaasoq aamma nappaatilerineq nalinginnaasoq, utoqqalineq utoqqalinermilu nappaatit kiisalu tarnikkut nappaatit ilanngullugit.

Imm. 3. Sulilluni sungiusarfiit ilinniartitaanermut ataatsimiititaliamit ilinniartitaanerup aaqqissuussaananerani najoqqutassatut allaaserineqartut naapertorlugit akuerineqassapput. Peqqinnissap inunnillu isumaginninnerup iluani sulliviit sulilluni sungiusarfissatut akuerineqarsinnaapput, taakkunani akisussaasumik sulilluni sungiusarnermi ilitersuisoqartitsineqarsinnaalluni.

§ 16. Sulilluni ilinniarnernerup siunertaraa, ilinniartup

1) nammineepluni isumassuineri pisinnaanngorsaanerimillu kiisalu meeraaqqerineri peqqissaanerimillu suliaasanik aaqqissuussisinaanngorlunilu suliarinnissinnaalernissaa,
2) nammineq akisussaaffimmi suliaasaqarfimmilu iluini peqqinnerulersitsiniarnissamik napparsimanaveersaartitsinissamillu nammineepluni suliarinnissinnaalersinnissaa, aammalu
3) nammineepluni nakkutiginnissinnaasunngornissaa, paasisaqarsinnaasunngornissaa, piareersaasinnaasunngornissaa, ataqatigiissaarisinnaasunngornissaa, suliarinnissinnaasunngornissaa, kiisalu meeraaqqerinnissamut peqqissaanissamullu pilersaarusiaasoq oqaaseqarfigisinnaasunngorlugulu nalilersuiffigisinnaasunngornissaa.

Imm. 2. Sulilluni ilinniarneq naammassiniarneqassaaq sulilluni sungiusarnissamut pilersaarutit nalinginnaasut ilinniartitaanerup aaqqissuussaananerani aalajangersakkat malillugit, tak. § 32.

§ 17. Sulilluni sungiusarnissamut isumaqatigiissut allaganngorluni isumaqatigiissutaassaaq kingusinnerpaamillu sungiusarnissamik isumaqatigiissutaasup aallartinnerani atsiorneqassalluni.

§ 18. Sulilluni sungiusarfup akisussaaffigaa sulilluni ilinniartitaaneq ilinniartitaanerup aaqqissuussaananerani najoqqutassat erseqqinnerusut malillugit naammassiniarneqarnissaa.

Imm. 2. Sulilluni sungiusarfik akisussaalluni ilitersuisussamik toqqaassaaq. Sungiusarnermi akisussaalluni ilitersuisoq minnerpaamik peqqissaanermi ikiortip ilinniarsimasaanut nallersuuttumik ilinniakkamigut tunuliaqutaqassaaq, sulillunilu sungiusarnermi ilitersuisutut pikkorissarsimasuussalluni.

Imm. 3. Peqqissaanermik ilinniarfik sungiusarnermi ilitersuisut ilinniartinneqarnissaannut akisussaavoq.

Imm. 4. Peqqissaanermik ilinniarfik ilinniartunut ataasiakkaanut sulilluni sungiusarnerup nalaani takusaasarsinnaavoq.

Kapitali 5

Naliliinerit misilitsinnermilu aalajangersakkat

Nalinginnaasumik aalajangersakkat

§ 19. Karakteeriliinerimi 13-skala atorpeqassaaq.

§ 20. Ilinniartitaanermut Pisortaqarfik ilinniartitaanermut ataatsimiititaliap inassuteqarneratigut soraarummeersitsinerimi nalileeataasussanik avataaneersunik toqqaassaaq. Soraarummeersitsinerimi nalileeataasussatut toqqagaasut allattorsimaffiat ilinniartitaanermut ataatsimiititaliamut nassiunneqassaaq.

Imm. 2. Soraarummeersitsinerimi nalileeataasussat ilinniarfimmud attuumassuteqassanngillat.

Piffissap atuagarsorfiusup 1-ip nalilerneqarnera

§ 21. Piffissap atuagarsorfiusup 1-ip naammassinerani ilinniarnernup aqqissuussaanerani aalajangersakkat naapertorlugit misilitsittoqassaaq, tak. § 32. Misilitsinneq atuagarsorluni ilinniarnermi ilinniarneqartut tunngavigalugit ingerlasimaneq aallaavigalugu Peqqissaanermik Ilinniarfimmud aqqissuunneqassaaq.

Imm. 2. Misilitsinneq soraarummeersitsisumit avataaniillu soraarummeersitsinerimi nalileeataasumit ilinniartitaanermut ataatsimiititaliamut toqqarneqartumit soraarummeersitsinerimi nalileeataasussat allattorsimaffianeersumit nalilerneqassaaq, tak. § 20.

Imm. 3. Piffissap atuagarsorfiusoq 1 angusiffigissagaanni ilinniartup minnerpaamik karakter 6 angusimasariaqarpaa.

Sulilluni ilinniarnernup nalilerneqarnera

§ 22. Sulilluni sungiusarnerit tamarmik immikkut napparsimasumik allaaserinninneq aallaavigalugu allaganngorlugu suliamik suliarinniffusassapput.

Imm. 2. Suliaq akisussaalluni sulinerud ilitersuisumit aamma Peqqissaanermik Ilinniarfimmud nalilerneqassaaq. Suliamut naliliissutigineqassaaq angusivoq/angusinngilaq.

§ 23. Piginnaassutsimik naliliineqartassaaq sulilluni sungiusarnerit naalernerit tamaasa.

Imm. 2. Ilinniartup piginnaaneqarnera nalilerneqartassaaq sulilluni ilinniarnernup siunertaa aamma allallugu suliap nalilerneqarnera aallaavigalugit, tak. § 22, imm. 2.

Imm. 3. Piginnaasaqassutsimik naliliinerud naliliissutigineqassapput angusivoq/angu-sinngilaq. Naliliineq tunngavilersorneqassaaq nassiunneqassallunilu Peqqissaanermik Ilinniarfimmud ilinniartumullu.

Imm. 4. Piginnaassutsimik naliliinerud Peqqissaanermik Ilinniarfik peqataasarsinnaavoq.

Naggataarutaasumik naliliineq

§ 24. Piffissap atuagarsorfiusup 2-p naammassinerani misilitsittoqassaaq. Misilitsinnerud pineqassaaq allattariarsorluni suliamik suliarinninneq oqaluttariarsorluni soraarummeernissamut tunngaviliisussaaq.

Imm. 2. Misilitsinneq soraarummeersitsisumit avataaniillu soraarummeersitsinerud nalileeataasumit ilinniartitaanermut ataatsimiititaliamut toqqarneqartumit soraarummeersitsinerud nalileeataasussat allattorsimaffianeersumit nalilerneqassaaq, tak. § 20.

Imm. 3. Misilitsinnerud naliliineq ukunannga aallaaveqassaaq:

1) ilinniagassani arfinilinni ilinniartup atuagarsornikkut timitalersuinikkullu ilisimasaminik atuinera, tak.

§8.

2) ilinniartup paasiniaaqqissaarsinnaassusia, akisisinnaassusia, ataqatigiissaarisinnaassusia aamma napparsimasuutit atugaanut aalajangersimasunut tunngatillugu nammineq iliuuseqarsinnaassusia tunngavilersuisinnaassusia, kiisalu

3) ilinniartup nammineq akisussaaffimmi piginnaatitaaffimmilu iluani iliuuseqarsinnaassusia.

Imm. 4. Piffissaq atuagarsorfusoq 2 angusiffigissagaanni ilinniartup minnerpaamik karakter 6 angusimasariaqarpaa.

Napparsimasimaneq pissutigalugu angusinngitsoornermilu misilitseqqinnerit

§ 25. Napparsimaneq pissutaalluni ilinniartup sulilluni sungiusarnermini suliasaminik piffissaq eqqorlugu tunniussisnaanngippat, piffissaq tunniussivissaq ilinniartup, sulilluni sungiusarnermi ilitsersuisup ilinniarfullu isumaqatigiissuteqarnerisigut allanngortinneqassaaq.

Imm. 2. Ilinniartuq napparsimanini pissutigalugu misilitsinnermut takkutinnngippat imaluunniit nammineq pisuussutiginaagu misilitsinnermut peqataanngippat napparsimalluni soraarummeernissamut inassutigineqarsinnaavoq. Ileqqusumik soraarummeersitsereernerup kingorna sapinngisamik piaarnerpaamik napparsimasup soraarummeersinneqarnissaa Peqqissaanermik Ilinniarfup aqqissuutissavaa.

Imm. 3. Napparsimaneq nakorsap nalunaarutaanik uppersarsaaserneqassaaq. Nammineq pisuussutiginnngisat allat ilinniartup misilitsissinnaannnginneranut akuerineqarsinnaasumik pissutaasinnaasut uppersarsaasiivigineqassapput.

§ 26. Misilitsinneq angusiffunngippat, tak. § 21 imaluunniit § 24, § 25-mi taaneqartut saniatigut ilinniartuq atuarfup misilitsineranut tulluuttumut peqataasinnaavoq. Misilitsinneq ataaseq ilinniartup pingasoriarluni misilitsiffigisnaavaa.

Imm. 2. Piginnaasaqassutimik naliliineq ilinniartup angusiffingngippagu, tak. §§ 22-23, sulilluni sungiusarnermi suliasamik annerpaamik ataatsimik suliasinneqaaqqisnaavoq piffissarlu sulilluni sungiusarfissaa suli marloriarluni sivitsorneqarsinnaalluni.

Imm. 3. Pissutsit immikkorluinnaq ittut pisariaqartippassuk ilinniartitaanermut ataatsimiititaliap ilinniartuq misilitseqqinnissamut suli ataatsimut peqataatissinnaavaa, sulilluni sungiusarnermi suliasamik suli ataatsimik suliaqarteqqillugu imaluunniit sulilluni sungiusarfigisaa suli sivitsoqqillugu.

§ 27. Ilinniartuq angusinngitsoorpat, tak. §§ 21-24, ilinniartitaanermut ataatsimiititaliap akuersissutigisnaavaa ilinniartup ilinniarnerninik nangitseqqinnissaa. Taamaaliornissaq ilinniartitaanermut ataatsimiititaliap piumasaqaasiorfigisnaavaa.

Kapitali 6

Oqaaseqaatit uppersarsaatillu

Ilinniarsimanermut uppersarsaat

§ 28. Piginnaasaqassutimik naliliineq, tak. § 23, kiisalu inaarsilluni misilitsinnermi angusineq, tak. § 24, tunngavigalugit ilinniartitaanermut ataatsimiititaliaq ilinniarnermut uppersaammik ilinniartumut tunniussaassaaq.

§ 29. Ilinniarsimanermut uppersaamat makkuninnga imaqassaaq:

- 1) Ilinniartup aqqanik CPR-normuanillu.
- 2) Ilinniakkap taaguutaanik ilinniarnernullu naammassinerani inatsisit tunngavigineqartut suunerannik.
- 3) Piginnaasaqassutimik naliliissutaasunik, kiisalu sulilluni sungiusarnermi suliasat suut sammeneqarsimanerannik.
- 4) Inaarutaasumik misilitsinnermi karakterimik.

Imm. 2. Ilinniarsimanermut uppersaamat ilinniartoq pillugu naliliissutinik imm. 1-imi taaneqartunit allaanerusunik imaqartinneqassanngilaq.

§ 30. Peqqissaanermik Ilinniarfiup ilinniarsimanermut uppersaamatit tunniunneqartut nalunaarsorsimaffiat ukiuni 20-ni toqqortarissavaa.

Kapitali 7

Naammagittaalliorsinnaatitaaneq

§ 31. Atuarfiup aalajangiussaata tiguneranit sapaatip-akunneri sisamat qaangiutsinnagit ilinniartoq naammagittaalliummik allagaasumik tunngavilersukkamillu tunniussaqaarsinnaavoq.

Imm. 2. Misilitsinnernut sulillunilu sungiusarnerni suliasanut tunngassuteqartut pillugit naliliinerup inerneranik nalunaarfigineqareernermi kingornagut ullut arfineq-pingasut qaangiutsinnagit atuarfimmu allaganngorlugu tunngavilersorlugulu ilinniartoq naammagittaalliuuteqarsinnaavoq.

Imm. 3. Naammagittaalliortup naammagittaalliuutiginiakkani immikkoortitaarlugit erseqqissarlugillu tunngavilersussavai. Pissutigineqartut makkuninnga imaqaarsinnaapput

- 1) misilitsinnermi tunngavigineqartut, matuma ataani ilitersorneqarneq kiisalu apequtigineqartut suliaassiisutilluunniit ilinniarnernup siunertaanut tunngasut,
- 2) misilitsinnerup ingerlarnga, aammalu
- 3) naliliineq.

Imm. 4. Peqqissaanermik Ilinniarfiup naammagittaalliuut suliarissavaa. Naammagittaalliuut malinnarneqanngippat Peqqissaanermik Ilinniarfiup naammagittaalliuut ilinniartitaanermut ataatsimiititaliamut suliasanngorlugu ingerlateqqissavaa.

Imm. 5. Ilinniartitaanermut ataatsimiititaliap aalajangiinera aqutsinikkut oqartussaasunut allanut naammagittaalliuutigalugu ingerlateqqinneqarsinnaanngilaq.

Kapitali 8

Aalajangersakkat allat

§ 32. Inuussutissarsiutitigut ilinniartitaaneq aamma inuussutissarsiutitigut ilinniartitaanermi pikkorissartitsisarneq pillugit Inatsisartut Peqqussutaannut kiisalu nalunaarummut matumunnga

naapertuuttumik Peqqissaanermik Ilinniartfiup ilinniarnermi maleruagassat erseqqinnerusut ilinniartitaanerup aaqqissuussaanerani aalajangersaavigissavai, ilaatigut makku imarineqassallutik:

- 1) Piffissat atuarfissat sulillunilu sungiusarfissat inissisimanissaannut pilersaarut.
- 2) Ilinniarnernup atuagarsornertaanut sulillunilu sungiusarnertaanut anguniagassat ilaat.
- 3) Atuagarsorluni atuartitsinerup nalaani ilinniartitsissutissat nalunaaquttap-akunnerisalu agguataarneqarnerat.
- 4) Sulilluni sungiusarfissat akuerineqarnissaannut piumasaqaatit.
- 5) Sulilluni ilinniarnissamut pilersaarutit suliaqarfissanik suliaassanillu sulilluni ilinniarnermut ilaatinneqartussanik allaaserinnittut.
- 6) Misilitsinnissat piginnaaneqassutsimillu naliliinerit qaqugu pinissaat.
- 7) Misilitsinnerit naliliinerillu ataasiakkaat pillugit aalajangersakkat.
- 8) Pinngitsoorani takkuttarnissaq pillugu aalajangersakkat.
- 9) Ilinniakkap peqqinnissamilu ilinniartitaanerit allat ataqatigiinnerinut takussutissiaq.

§ 33. Immikkut ittumik pissutissaqartillugu Ilinniartitaanermut Pisortaqaarfiup nalunaarutip saneqqunneqarnissaa pisinnaatitsissutigisinnaavaa, taamaaliornissaq ilinniarnermi misiliinerussappat. Pisinnaatitsissummi sivilissusissaa nalunaarusiornissallu ilusissaa aalajangersaavigineqassaaq.

Kapitali 9

Atuutilerfissaa atorunnaarsitsinissarluk pillugit aalajangersakkat

§ 34. Nalunaarut 1. aprili 2001 atuutilerpoq ilutigitillugulu atorunnaarsinneqassaaq Kalaallit Nunaanni Peqqinnissamut ikiortit ilinniartitaanissaat pillugu Sundhedsstyrelsip kaajallaasitaa 17. juni 1980-imeersoq.

Namminersornerullutik Oqartussat, ulloq 6. marts 2001.

Lise Lennert

/

Karl Kristian Olsen

Namminersorlulik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit
Namminersorlutik Oqartussat inatsisinut toqqorsiviat
Naalakkersuisut